

AKASHVANI AIZAWL

(MIDDAY)

<><><>

AIZAWL AQI

Kum hlui thlah zan khan Aizawl khawpui-ah halpuah, halmawi leh meithallawn an hal nasa hle a, mahse, boruak a nghawng dan hriat theih a ni lo.

Mizoram Pollution Control Board (MPCB) hotute Akashvani Aizawl news-in a be pawp a. Hemi zan dar 11 leh a chanve leh dar 12 leh a chanve inkar a Aizawl khawpui boruak chhiat leh that dan a zawhna chu an chhang thei lova, an khawl a chhiat vang a nih thu an sawi. MPCB member secretary Pu C. Lalduhawma’n a sawi danin an khawl hi central server lam chhia nge tih an en Chiang mek a, a lo inchhinchhiah dan a hmuh leh theih em tih an la hre rih lo a ni. He tih lai hian Aizawl a India Meteorological Department (IMD) hotute chuan nimin, January ni 1, chawhnu dar 4 khan Aizawl a Air Quality Index (AQI) chu 45 niin a tha-ah an ngai a. A hma zan lai AQI erawh chu an sawi thei lo thung a ni.

Krismas urlawk zan khan Aizawl khawpui chhungah halpuah leh a behbawm hal a awm meuh loh avangin zan lai dar 12 leh minute 5 khan Sikulpuikawn a AQI chu 38 niin MPCB khawl chuan a chhinchhiah a ni.

<><><>

ARSON

Saitual Venglaia mi Pi Lalhnezhovi in Assam Type chu nimin tlai thimhlim 5:30 vel khan a kang a, bungrua chuh mumal hman a ni lo na-in in hi a pumin a kang chhe hman lo thung.

In kang hi hriat a nih velekh khawtlangin thelh an tum nghal a, hemi avang hian a pumin a kang chhe hman lo hlauh a ni. In kan chhan hi Chiang taka hriat ni lo a, Saitualah chawhnu lam zawng eng a awm lova, tlai dar 5:30 vela eng a rawn awm velekh pawn lama mite’n in chhunga thil puak ri an hria a. He tih lai hian in nghak leh in neitute an awm loh lai a ni a, mut pindan atanga kangmei hi chhuak tan niin an sawi.

Khawtlang hruaitute chuan zan lam thil a nih avangin kang thelh bak intihpalhte a hlauhawm avangin khawvar hnuah bungraw senghawi ngai senghawite leh hnatlan dan tur an rel a ni.

He in kangah hian Pi Lalhnezhovi leh a fate pathum an cheng a ni.

<><><>

TRAIN TIMING

Nimin January ni 1 atang khan Guwahati-Sairang Guwahati Express rel chu a hun ngai angin a tlan chhunzawm.

Northeast Frontier Railway (NFR)-a chief public relations officer (CPRO) Pu Kapinjal Kishore Sharma hnen atanga Akashvani Aizawl news-in thu a dawn danin a hma a rel tlan hun sawn tura lo tih tawh, January ni 1 atanga hman tan tur chu sut leh a ni a. Tihdanglam tura an duan dan chuan Guwahati atanga Sairang pan tur rel hi zing dar 6-ah Guwahati chhuahsanin zan dar 7 leh a chanve a Sairang thleng tura tih a ni a. Chutiang bawkin Sairang rel chawlhmun atanga zing dar 6 a chhuakin zan dar 7 leh a chanve a Guwahati thleng tura ruahman a ni. He ruahmanna thar hi sut a nih leh tak avangin Guwahati atanga Sairang pana rel chhuak chu a hma ang bawkin tlai lam dar 7-ah Guwahati chhuahsanin a tuk zing lam dar 8 leh a chanve-ah Sairang a thleng a. Sairang rel chawlhmun atang pawhin tlai lam dar 7 a chhuakin a tuk zing dar 8 leh a chanve-ah Guwahati a thleng leh a ni.

Pu Sharma chuan rel hi zan lama a tlan chhunzawm leh tak avangin ruahman angin khawthlir nuam bik Vistadome coach pawh dah a ni ta rih lova. Hun lo la kal turah rel hnuhtir ve dan tur dap a la nih dawn tho thu NFR CPRO chuan a sawi a ni.

<><><>

POLICE REPORT

Nizan khan hmeichhe pakhat chuan a ngaihawng ni a hriat a vit a, Police-te'n an man.

Mizoram chhung Police Station hrang hrang atanga Akashvani News Aizawlin thu a dawn danin nimin tlai atanga tukin thlenga tang awm zat chu 15 an ni a, heng zingah hian hmeichhia 3 an tel. Mizoram chhunga Police Station leh Police Outpost hrang hrangte chhinchhiahna atanga a lan danin, rukruk kaihnhawiha man mi 4 an awm a, zu rui a buaina siam vanga man mi 3 leh chhungkua a buaina siam avanga tang mi 3 bakah ruihhlo vanga man mi 2, chemtea mi vih vanga man mi 1, mi khawih tum vanga man 1 leh thubuai kal lai chungchanga rinhlelh a man 1 a awm bawk.

Aizawl Police Station-ah chemtea invih thubuaiah hmeichhe pakhat kum 40 mi, Ramthar Tlang Veng a khawsa mek ni a inchhal chu man a ni a. Police atanga Akashvani News Aizawlin thu a dawn danin pawikhawihu a puh leh a bialpa chu Rangvamual a an zu la haw, a mipa zawkte inah hian intibuaiin a hmeichhia zawk hian chemte a chuh a, a mipa lo indang chu a ban tawn tawnah a vit a, mipa hi Civil Hospital Aizawlah admit niin, mipa chhungte hian FIR an theluh bawhzuiin hmeichhia hi man a ni a, vawiinah court-a hruai a nih hnuah Central Jail-a dah luh nghal a ni. Aizawl Police Station-a tang hmeichhe dang pakhat zawk hi rukruk vanga man a ni.

Lunglei Police Station-a tang 5 awm zingah 2 te chu zu rui a intihbuai vanga man niin, tang dangte chu rukru a rinhlelh man 2 leh thubuai kal lai chungchanga rinhlelh man 1 te an ni a. Champhai Police Station-a tang mipa 2 te hi chhungkaw thubuai a man an ni a, hmeichhe awmchhun hi Zokhawthar Police Station-a ruihhlo thubuai a man, thu zawhfiah leh tura Champhai Jail atanga an lak chhuah la

hren zui tak zel a ni. Kulikawn Police Station-ah zu rui a buaina siam vanga man 1 leh rukru a rinhlelh man 1 an awm a. Khawzawl Police Station-ah tang 2, mi khawih tuma rinhlelh man 1 leh chhungkaw thubuai a tantir 1 an awm a. Saitual Police Station-ah Assam mi pakhat, Methamphetamine ni a rin Kg 11 chuang mansak chu an kawl mek bawk.

<><><>